

Udruženje za zaštitu i unapređenje okoliša, prirode i zdravlja "Ekotim" podnijelo je 14.10.2016. godine zvaničnu žalbu Sekretarijatu Energetske zajednice u vezi nepoštivanja graničnih vrijednost zagađenja zraka za planirani novi blok 7 termoelektrane Tuzla, za čiju izgradnju vlasti Federacije BiH namjeravaju tražiti kredit od kineske "China Exim" banke. Nepoštivanje propisanih graničnih vrijednosti bi rezultiralo potrebom za dodatna ulaganja u tek izgrađeno postrojenje. Ovo je najnovija u nizu pravnih aktivnosti koje su pokrenula BiH udruženja protiv novih planiranih termoelektrana na ugalj zbog negativnih zdravstvenih i klimatskih uticaja koje će ovi objekti prouzrokovati ukoliko se izgrade.

U proteklom periodu su, na kantonalnom sudu u Sarajevu, podnesene tri tužbe protiv Rješenja koja je izdalo Federalno ministarstvo okoliša i turizma kojim se traži poništenje okolišnih dozvola za novi blok 7 termoelektrane Tuzla, TE Banovići i akumulaciju Ramići. Pored toga, prije nepuna tri mjeseca Sekretarijatu Energetske zajednice je podnesena zvanična žalba protiv Bosne i Hercegovine zbog nejasnoća u vezi dozvoljenih graničnih vrijednosti emisije zagađujućih materija, koje su navedene u okolišnoj dozvoli za TE Banovići.

U Republici Srpskoj, termoelektrana Stanari je zvanično puštena u pogon u septembru iako je tužba Centra za životnu sredinu protiv ekološke dozvole za istu i dalje na sudu. Također je u proceduri žalba protiv Presude upravnog suda u vezi tužbe protiv ekološke dozvole za termoelektranu Ugljevik III. CZZS je u decembru 2014. godine takođe uručio žalbe Energetskoj zajednici u vezi dozvoljenih vrijednosti emisije iz planirane termoelektrane Ugljevik III.

Najnovija žalba prema Sekretarijatu Energetske zajednice se podudara sa zasjedanjem Ministarskog vijeća Energetske zajednice u Sarajevu, koje je završni događaj jednogodišnjeg predsjedanja BiH nad ovim regionalnim tijelom.

"Više od deset godine nakon stupanje na snagu Ugovora o uspostavi energetske zajednice, vlasti u BiH uporno dokazuju da ili nisu sposobni ili nisu spremni ispravno provesti najosnovnije obaveze iz ovog Ugovora - kvalitetne procjene uticaja na okoliš. Već godinama upozoravamo da nove termoelektrane puštene u funkciju nakon 01.01.2018. moraju biti u skladu sa EU Direktivom o industrijskim emisijama, ali vlasti u BiH još uvijek u okolišnim dozvolama nisu ispravno utvrdili te standarde", komentirao je Rijad Tikveša, predsjednik Ekotima Sarajevo.

"U svakom slučaju je nerazumljivo da vlasti u BiH tvrdoglavo insistiraju na izgradnji novih termoelektrane na ugalj u vremenu kad je skoro sigurno da će te investicije, zbog klimatske politike EU-a te niskih cijena električne energije, biti ne isplative. Cijene tehnologija za proizvodnju energije iz sunca i vjetra brzo pada, ali BiH i dalje propušta da iskoristi svoje

potencijale”, dodao je Igor Kalaba, Koordinator programa Energija i klimatske promjene Centra za životnu sredinu iz Banja Luke.

izvor: tip.ba